

Saopćenje povodom objavljivanja Izvještaja revizije učinka „Upravljanje smještajnim kapacitetima budžetskih korisnika FBiH“

Ured za reviziju institucija u FBiH proveo je reviziju učinka na temu **„Upravljanje smještajnim kapacitetima budžetskih korisnika FBiH“**. Cilj revizije bio je ispitati da li su Vlada FBiH i Služba za zajedničke poslove organa i tijela FBiH preduzimale adekvatne aktivnosti za ekonomično i efikasno upravljanje smještajnim kapacitetima budžetskih korisnika FBiH.

Provedena revizija za period 2013.-2015. godina pokazala je da **nisu poduzete odgovarajuće aktivnosti, kako bi se sistemski upravljalo smještajnim kapacitetima budžetskih korisnika FBiH, što je rezultiralo neopravdanom potrošnjom budžetskih sredstava, za zakup poslovnih prostora, kupovinu i adaptaciju tuđih objekata.**

Revizijom je konstatovano da **Vlada FBiH ima na raspolaganju veliki broj poslovnih prostora, koje pored vlastitih prostora, čini i imovina bivšeg Zavoda za platni promet FBiH i bivšeg Federalnog ministarstva odbrane. Međutim nije posvećena dovoljna pažnja racionalnijem korištenju ovih prostora, kako bi se pitanje smještaja riješilo u okviru raspoloživih kapaciteta i time troškovi zakupa sveli na najmanji mogući nivo.**

Umjesto planskog iskorištavanja vlastitih prostora, Vlada FBiH je uglavnom razmatrala mogućnosti kupovine ili unajmljivanja objekata koji nisu u vlasništvu FBiH. Revizija je konstatovala da su u prethodnim godinama **značajna budžetska sredstva (6,7 milijuna KM) uložena u tuđe objekte, koji nisu iskorišteni za rješavanje smještaja budžetskih korisnika FBiH.**

Istovremeno, troškovi zakupa poslovnih prostora za potrebe smještaja Vlade FBiH i njenih institucija kontinuirano su imali trend rasta i u posmatranom periodu revizije iznosili su **cca. 12,5 miliona KM**. Rezultati revizije pokazali su da Vlada FBiH nije usvojila potrebne propise (uredbe, odluke, normative) u cilju regulisanja zakupa prostora za rad budžetskih korisnika FBiH, što je imalo za posljedicu zakup prostora različitih površina i cijena, bez odgovarajuće procjene ekonomske prihvatljivosti pojedinačnih ugovora o zakupu. Revizija je konstatovala da **Vlada FBiH i Služba za zajedničke poslove organa i tijela FBiH nisu osigurali ekonomično, efikasno i transparentno ugovaranje zakupa prostora za smještaj budžetskih korisnika FBiH.**

U 2016. godini nastavljeno je sa praksom ulaganja u tuđe objekte, te je odlučeno da se kupi objekat „Staklena banka“ u Mostaru koji nema riješen imovinsko-pravni status, po cijeni od **cca. 6 miliona KM**. Procijenjeno je da će stavljanje u funkciju ovog objekta zahtijevati dodatna ulaganja u iznosu **cca. 9,5 miliona KM**.

Rezultati revizije pokazali su da postoji značajan prostor za unapređenje ekonomičnosti i efikasnosti upravljanja smještajnim kapacitetima budžetskih korisnika FBiH. **Ured za reviziju cijeni da se u ovom segmentu budžetske potrošnje mogu ostvariti velike uštede i postići odgovornije upravljanje javnim sredstvima.**

Sarajevo, 24.07.2017. godine